

Date – 06/12/2025

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n Mizo hnam zingah Hmar hnam chu a lian ber pawl an nih avangin u chan chang thiam a, Zofate inpumkhatna ngai pawimawh turin a chah.
2. Sainik Welfare & Resettlement direktorate bultumin nimin khan Mizoram chhunga Sainik Welfare pisa awmna district paliah 'Armed Forces Flag Day' hman a ni.
3. RD Minister Prof Lalnilawma'n MGNREGS hnuaia inhlawhna hlawh thla 4 chhung la dawn loh chungchangah State sorkar chuan thiam lohna a neilo tih a sawi.
4. India leh Russia chuan nimin khan inremna thuthlung 16 an ziak dun.



SIKPUI RUOI 2025

Chief Minister Pu Lalduhoma'n Mizo hnam zingah Hmar hnam chu a lian ber pawl an nih avangin U chan chang thiam a, Zofate inpumkhatna ngai pawimawh turin a chah.

He thu hi nimina Hmar Students' Association General Assembly Vawi 60-na, SIKPUI RUOI 2025 Saipum khuaa neih a hmanpuinaah sawiin, Chief Minister Pu Lalduhoma chuan zirlaite chu nakin lawka ram enkawltu turte an ni tih sawiin ram leh hnam tha zawk nei turin an pawimawh hle a ti a, ramin a neih ropui ber

chu a mihring chengte an nih avangin kal khawmte chu ram hmasawna tura mawhphurtute an ni, a ti.

Chief Minister chuan, sawrkar hnathawh tum zirlaite dinhmun tih hmasawn nan theihtawpin sawrkarin ke a pen a ti a, mahni kea din tumte chu an bana kaia khai chhuak turin Bana kaih scheme an chhawp chhuak tih sawiin kuthnathawh lama thawkte leh thawh tumte thlai thar leisakin, mi tin tan remchanna an siamsak tih a sawi.

Pu Lalduhoma chuan, ruihhlo laka himna awlsam ber chu tih chhin ve loh a ni tih sawiin, zirlai kal khawmte chu ruihhlo laka fihlim turin a chah a. Zofate inpumkhatna ngai pawimawh a, inpumkhatna fatu-ah tang zel turin kalkhawmte a chah bawk a ni.

He hunah hian Mizoram Assembly Speaker Pu Lalbiakzama chu Khualzahawm a niin; IP&R Minister Pu B. Lalchhanzova'n a tawiawm bawk a ni.



ARMED FORCES FLAG DAY

Nimin khan Sainik Welfare & Resettlement diretorate bultumin Mizoram chhunga Sainik Welfare pisa awmna district paliah 'Armed Forces Flag Day' hman a ni.

Sainik welfare hotute atanga thudawn danin Armed Forces Flag Day hi India ram pumah kum tin December Ni 7-ah kum 1949 atang khan hman thin a ni a. Kuminah a ni hi chawlhniah a tlak avangin Larsap remtihain ninim khan hman a nih thu an sawi a. He hi hian indonaa nunna chan ta nupui fanau te, hliamturar a ramtuileilo a awm te, Ex-servicemen leh hmeithai harsa zual te tanpui nan mi tlawmngai leh inphal te hnen atangin tanpuina khawn thin a nih thu an sawi a ni.

Sainik welfare hruaitute chuan ninim khan Governor Secretariat, CMO Office, Speaker, Minister, Chief Secretary leh Department hrang hrang Secretary te hnen atangin tanpuina khawn a nih thu leh, cheng sing 4 sangthum leh sawm hmuh a nih thu an sawi a. Hei bakah hian district dang pali ten Armed Forces

Flag Day pual hian thawhlawm an khawn leh bungrua an tihral atangin thahnem tak hmuh belh an beisei thu an sawi a. Tlawmngaia thawhlawm petu zawng zawngte leh Flag Day bungrua chan sak tu zawng zawng te chung a an lawm thu an sawi bawk a ni.



AGRICULTURE MINISTER

Agriculture Minister Pu PC Vanlalruata'n Mizoram atanga thlai tharchhuah zingah Mizo sawhthing chu an chhuang zual hle tih sawiin, Mizoram sorkar chuan kuminah loneitute hnen atanga sawhthing a leina support price atan cheng cheng vbc 137 chuang a seng tawh a ti.

Nimina Agriculture & Farmers' Welfare Department buatsaih Aijal Club-a BUYER-SELLER MEET 2025 an hmannaah he thu hi sawiin, Agriculture Minister Pu Vanlalruata chuan nikuma BUYER-SELLER MEET an lo neih tawh chu thlai thar chhuaktu loneitute thawhrimna leh an tharchhuah leisaktute zarah a hlawhtling hle a ti a, kumina BUYER-SELLER MEET an neih leh tur chuan nikum a khum ngei a rin thu a sawi a, Mizorama thar chhuah sawhthing, aieng, Mizo hmarchate leh buhfaita chuan ram chhung hmun hrang hranga sumdawna lian tak a thleng tawh tih sawiin Mizoram atanga thlai an tharchhuah zingah Mizo sawhthing chu an chhuang zual hle tih a ti a, kumin chungin Mizoram sorkar chuan loneitute hnen atanga sawhthing a leina support price atan cheng cheng vbc 137 chuang a seng tawh a ti a, tunhnaia New Delhi-a NITI Aayog-in stakeholder inrawnkhawmna a buatsaihah Mizorama sawhthing chingtute tan Mizoram sorkar leh sorkar laipuiin loneitute tan sumdawna tha tak an siam sak zia a lantir tih a sawi a, sorkar chuan loneitute hlawkna leh hamthatna atan engmah tih hreh a nei dawn lo tih sawiin, Mizoram sorkar chuan marketing system tichak lehzual tur leh minimum support price kalpui zel turin hma an la dawn tih a sawi ni.

Mizoram Agricultural Marketing Board -in International Fund for Agricultural Development, leh Mission Organic Mizoram, te thawhpuaia an buatsaih BUYER-SELLER MEET

2025 hi vawiin December ni 5 leh naktuk December ni 6 hian Aijal Club-ah neih a ni dawn a, he hunah hian Mizoram hmun hrang hranga loneitute thlai thar leh an kutchhuak te lei theiha phochhuah a ni ang.



DGP PRESS CONFERENCE

Director General of Police Pu Sharad Agarwal chuan hunpui lo thleng turah mipuiten ralmuang taka hun an hman theih nan khauh zawkin venhimna kenkawh a ni dawn a ti a, zanah khawpui chhung leh district hrang hrangah Police an vak kual thin dawn tih a sawi.

DGP Pu Sharad Agarwal chuan kumin July ni 30 atanga office a luah hnua a vawikhatna atan nimin khan thuthar thehdarhtute chu DGP conference hall, Police Headquarters (PHQ), Khatla, Aizawl-ah a kawm a. Mizoram venhimna kawnga kumin chhunga Police hmalakna hrang hrang sawiin an hmalakna zingah ramri chhehvelah khawtlang hruaitu leh tlawmngai pawl te nen thawk hovin Police te chuan ngawrh takin ruihhlo tawlhruk tur an veng a ti a, hei bakah hian Inner Line Permit (ILP) pek chhuah chungchangah Police chuan khauh takin hma an la mek tih sawiin, hunpui lo thleng turah pawh mipuiten ralmuang taka hun an hman theih nan khauh zawkin venhimna kenkawh a ni dawn a ti a, zanah khawpui chhung leh district hrang hrangah Police an kal kual thin dawn tih sawiin, thuthar thehdarhtute chu thawhho puiah a sawm a, dan kalha thil thleng chungchang an hriatte chu Police te hnenah thlen hreh lo turin a chah a ni.

Byte: Mizoram DGP Pu Sharad Agarwal

Mizoram DGP Pu Sharad Agarwal hi kum 1973 khan Uttar Pradesh ah piangin, IIT Delhi atangin B. Tech in Civil Engineering leh M. Tech in Water Resources Engineering a zir chhuak a, kum 1997 khan AGMUT cadre ah IPS-ah tlingin, ram chhung hmun hrang hrangah post a nih hnua kumin July ni 30 khan Mizoram DGP hna a thawk tan a, hna a thawh that avangin chawimawina hrang hrang, President Police Medal for Meritorious Service on Independence Day, President Police

Medal for Distinguished Service on Republic Day, leh Hard Area Medal te a lo dawng tawh a ni.



RD MINISTER

RD Minister Prof Lalnilawma'n MGNREGS hnuaia inhlawhna hlawh thla 4 chhung la dawn loh chungchangah State sorkar chuan thiam lohna a neilo tih a sawi.

Nimin khan RD & LA department Minister Prof Lalnilawma chuan Thingdawl RD Block kum 50 a tlin lawmna hmanpui in, BDO Office building thar a hawng a, he hunah hian Minister chuan ni 100 inhlawhna thla 4 chhung dawn loh chungchangah State sorkar chuan thiam lohna a neilo tih sawiin sawrkar chuan a tihtur ang zel a tih thu a sawi a, December ni 2 khan Sanction order tichhuakin, State dawng hmasa bik an awm lo a ti a, Mizoram chu Central-in a hrek biklo tih sawiin sanction order an hmu tawh a ti a, nakin lawkah Finance Department-in an tihtel hunah mimal Account-ah lut thei dawn a ti bawk.

Minister chuan Thingdawl RD Block in kum 50-na (Golden Jubilee) a thleng thei chu a lawmawm atih thu sawiin RD Block rinchanin mipuiten hmasawna tam tak anlo hmuh tawh bakah Huan leh thlai tha tak te an neih phah tawh a ni a ti a. MzSLRM hnuaia Self Help Group ten an thil siam chhuah leh thar chhuah tura hmalak mek niin, a hming atan 'Sêl-hêl' tih hmang turin Registration tih mek a ni, a ti bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PMUY

Sawrkar laipui hmalakna Pradhan Mantri Ujjwala Yojana (PMUY) hnuaiah Mizorama chungkaw khawsak harsa hmeichhiate hnenah a thlawna Gas connection 36031 pekchhuah a ni tawh.

PMUY hmalakna puang zarin nimin khan FCS&CA Secretary Pi Teresy Vanlalhruaii leh IOC DGM Z.Hlungdim bakah hotu dangten thuthar thehdarhtute kawmin PMUY Scheme chu sawrkar laipuiin kum 2016 May thla khan bulṭanin ramchhunga chungkaw khawsak harsa hmeichhiate hnenah a thlawnin Gas connection pekchhuah thin a ni an ti aa, PMUY beihpui thlakna ramchhungah Gas connection vaibelchhe 10.33 pekchhuah tawh niin Sawrkar laipui chuantunhnaiah connection nuai 25 a pe chhuak leh dawn tih sawiin heng pekchhuah thar zingah Mizoram atanga a tam thei ang ber an tel theih nan a rang lama inziah luh vat a pawimawh thu an sawi a ni.

Byte : FCS&CA Secretary Pi Teresy Vanlalhruaii

PMUY hi Mizoramah connection 36031 pekchhuah tawh a ni a, heng zingah hian Mamit District ah tam berin connection 7462 pekchhuah a ni tawh a, Aizawl in dawtin 6818 connection pek a ni a, Lunglei ah 4358 leh Kolasib ah 4524 pekchhuah niin Lawngtlai District ah connection 3850 pekchhuah a ni a, Champhai ah 2187 pekchhuah niin Serchhip ah 1891 leh Hnahthial ah 1825 pekchhuah a ni a, Saitual ah 1225 pekchhuah niin Khawzawl ah connection 1051 pekchhuah a ni tawh bawk.

PMUY hnuaiah hian chungkaw khawsak harsa LPG connection la nei ve lo te hnenah chungkuaa hmeichhe kum tling hmingin a thlawna Gas connection pekchhuah thin a ni a, dil tur chuan LPG Distributor ah emaw pmuy website emaw Common Service Centre hnai berah ngaihven theih a ni ang.



INDIA-RUSSIA

India leh Russia chuan nimin khan inremna thuthlung 16 an ziak dun.

Inremnaah hian ram venhimna, insumdawntawanna, hriselna, zirna, sakhuana leh thil dang hrang hrang chungchangah an ziak dun a. India leh Russia Annual summit vawi 23 na New Delhi a neih ah hian ram aiawh hotulu te in bia in. Prime Minister Narendra Modi pawhin thu sawiin India leh Russia inlungualna chuan chakna siamin khawvel hmachhawn thei turin theihna a nei a ni a ti. India leh Russia chu firfiakte do kawng ah an thawkdun tih sawiin, an do zel dawn tih a sawi bawk. Russian President Vladimir Putin chuan thuthar thehdarh tute hmaah thu a sawi bawk a ni.

Pu Modi chuan Russia President lo zin chuan ram 2 te tan thawhdunna hlu tak a siam ani a ti a, kum 10 kalta chhung khan khawvel in an thawhdunna te a hmu ani a ti a, India leh Russia thawhdunna chu a nghet zel a ni a ti.

